



覆饒道長屯鹽開山鑄錢疏

題爲借一日之震惕開萬禱之靈長當及時圖維  
以資撻伐事專理新餉山東清吏司案呈本年  
二月二十一日奉本部送戶科抄出江西道監  
察御史饒京題前事等因本年二月十九日奉  
聖旨奏內用人增兵理財均目前急務該部各與議  
覆欽此又該江西道監察御史饒京題爲括言虜

情併祈

聖諭安天下而固人心事奉

聖旨這本說制虜機宜全在有備及諭安人心知道了開山鑄錢是否便計該部詳議具覆欽此欽遵抄出到部送司查用人增兵該吏兵二部議覆外其理財及開山鑄錢事宜相應摘覆案呈到部該臣等看得自古譚理財者無過屯鹽鼓鑄此正臺臣所謂從大頭腦上講求始可以爲經久之計者及查屯田一項先經臣部議舊屯新屯兵屯商屯之法頗極詳盡繼而科臣汪始亨又議屯田應照民田起科之法亦已通行省直遵行造冊諒必得索以報矣其鹽法一項臣部去歲採集廷臣之議欲令加引加鹽廣求生殖近止兩浙增引三萬道增課八千兩在山東運司鹽臣謂其地窄引壅原增之引難銷在長蘆則願代銷山東新引以完原增之課亦已稍增課額其餘俱未有以報也頃臣部於再議措餉未盡事宜疏內業已催行查奏無容再議者矣至于鼓鑄一節不獨南北開局已也先是亦曾通行各省直廣鑄取其息以補新餉之不足無

度支奏議 卷之六  
柰旋開旋罷苦於無息今日所現開者只有湖  
廣陝西四川雲南宣密二鎮而已第按四省所  
鑄其息亦不盡歸於

朝廷而復苦於無鑄本揆厥所繇總買銅而非採銅  
也有地方之責者每懼生事擾民而以開採爲  
戒曾不思荆楚秦晉各商所負販而來者果天  
雨地湧乎以天地自然之利爲奸民所專而

國家倍費以易之亦何賴焉善哉臺臣之言曰買  
銅不如採銅運銅不如運錢真得救時之急者

### 劑虛之妙用矣臣考

會典洪武之初永樂九年嘉靖六年俱差官於各  
省直鑄錢解京蓋因利於天地轉輓於九府取  
不竭而用不窮有裨軍需良非淺鮮夫開採非  
難而總總過憂者恐撫按不加意監司不得人  
耳假令該省撫按查照產銅地方選委風力司  
道一員提一旅以彈壓其間比照開礦規則或  
三七或四六與小民共之則銅山之利

朝廷始能收爲已有小民所採之銅照時值以市易

入官將私販可絕而買銅之工本可省矣或以  
所鑄之錢務照京式輕重畫一即可作本省襍  
支等費而該省存留之銀便可解京以充所得  
之息一省卽數十萬可立致也如鑄錢果多不  
妨解京充餉所費不過水脚已耳夫銅與鉛皆  
錢局所必須今山西之陽城廣東之陽山俱已  
許其採鉛點銅以資鼓鑄何獨至於採銅而疑  
之但恐別有金銀之鑛則仍當查明閉塞不得  
輕開以釀弊端或原無銅鑛地方亦宜聽其自

然不得逼勒以滋多事耳語曰非常之原黎民  
駭焉言創始之難也是在撫按司道設誠而力  
行之務期有成效可耳至如湖廣年來未嘗不  
鑄而其息卒未解分文到部總以無所考成以  
後允鼓鑄地方以取息之多寡爲司道之殿最  
其監司官假以便宜無掣其肘則每年可得數  
十萬金錢亦何憚而不爲乎臣愚極知開採一  
事人所諱言惟是鑄山煮海古有成法今臺臣  
旣已嘔心而畫臣部何難借箸爲籌當此三空

四盡之時此亦度支之權宜而非所得已者也  
既經具題前來相應覆

請恭候

命下臣部移文各該督撫并錢法司道及都察院轉  
行巡按御史遵奉施行三月初十日具

題本月十五日奉

聖旨採銅廣鑄用佐軍興爾部既已商確依議行還  
着各撫按嚴飭經管官立法慎防務使利出於地  
害不及民亦不許影借空取銀礦致生他端屯蓋

一二項着各撫按具奏欽此

議復天津正振兩營兵馬疏

題爲議復正振兩營兵馬以壯重鎮以保萬全事  
專理新餉山東清吏司案呈崇禎三年三月初  
四日奉本部送戶科抄出天津督餉部院翟鳳  
翀題前事三月初一日奉

聖旨該部酌議具覆欽此欽遵該戶科參看得天津  
爲漕糧咽喉之地亦爲奴虜窺伺之地非得重  
兵以防禦之難以保百萬之糧米而通

京師之命脉舊設正振兩營原有深意後以清汰

撤去實未深長思也今虜踞內地耽耽虎視卽舊營而在尚當增益今之當復不待再計而決者也其或以河間新兵充之或再招土著以充之與夫分防實抵專設總兵皆撫臣計畫之最當者因兵計餉戶部當急爲之所矣抄出速覆之又該直隸巡按御史張學周題同前事奉聖旨津門列營厚防已有屢旨這奏內事宜該部卽與議覆欽此又該通州總兵楊國棟奏爲募兵易客爲主事等因奉

聖旨這募練土著撤回標兵并月餉軍需該部卽與議覆欽此欽遵咨會到部通送到司爲照津通皆根本重地關係匪輕除復營設鎮募兵等項事宜樞臣念切封疆自能相機籌畫無容再議外所有月餉相應議覆案呈到部該臣等看得狡如內踞處處設防津門實南北之咽喉而通州又東西之門戶也重兵捍禦乃今日之急着惟當此匱詘之時增兵非難而因兵增餉尤難若天津原設立五營兵馬防護水陸誠重之也向



裁去正振二營取其餉以補關寧之缺額今虜  
耽耽虎視矣復二營之舊以揚我武似無容再  
計者因口授食則每月額支餉銀六千四百八  
十九兩二錢七分應還其固有而從前經制不  
可爲憑其支給糧餉須以立營到伍之日爲始  
此在津部酌定而臣部按數給發者也聞選河  
間之新募者以充之誠屬深計寧求盡人精壯  
毋徒充數誇多選一人卽得一人之用給一餉  
卽得一餉之實至於衣裝器械自有司存臣部  
不得越俎而問矣如防通標兵當其選揀而行  
亦按京營之銳不謂出戍日久思歸轉切鎮臣  
洞見底裏另覓土著以訓練復扣京軍日費行  
糧菹菜銀兩作新募月糧良爲妥便第京軍之  
應援特暫耳茲募兵則遂爲久計矣所需糧餉  
似不得不從長酌議以定畫一之規查得該鎮  
官兵廩糧月餉先該臣部屢次酌議劄行該鎮  
中軍都司一員每月支廩銀十五兩旗鼓守備  
一員每月支廩銀十兩千總月支四兩五錢把

總月支三兩其招募新兵照津門之例每兵一  
各月支銀一兩四錢如或願領本色卽給米四  
斗五升作銀三錢五分外給折色銀一兩五分  
共作一兩四錢之數如願單領折色則徑給銀  
一兩四錢俱聽各兵情願無不可者蓋不分三  
等而槩以中等爲率則兵之月餉亦不爲不厚  
然增兵必須增馬亦照津例每馬一匹月支草  
料乾銀八錢七分或俟冬春之間量扣馬乾買  
本色草料與之所當并爲議及者也今總兵楊

國棟疏稱已募土著千名似應查照前例支給  
月糧用示齊一第先後日期不同名數亦異仍  
令將招過兵丁數目逐一造冊呈報到部以便  
查給可耳夫新餉加派年來原不足經費之額  
惟那東湊西挹此注彼僅可補救於目前津門  
正振二營之餉是減於額內而通州新兵之餉  
又增之額外者也額內者旣已盡復其舊額外  
者將何以應其求見募之千名猶可免力支撐  
倘若增至數千則月餉不貲當飛疊交罄之時

而欲供日增月益之需臣計轉窮臣心滋戚誠  
不知所終矣既經具題前來相應覆

請恭候

命下臣部移文各該衙門遵奉施行

崇禎三年三月十一日具

題本月十四日奉

聖旨是欽此

覆科臣裴君賜條議催徵禁革疏

題爲催餉之使四出恤民之政宜先懇乞

聖明揆情審勢滌弊釐奸以普

浩蕩之恩以成急公之誼事專理新餉山東清吏司

案呈崇禎三年三月初五日奉本部送戶科抄

出戶科給事中裴君賜題前事等因本年三月

初三日奉

聖旨軍興正急額賦自難緩徵若地方官催收有方  
民自樂輸裴君賜這疏深於民隱有裨着通飭行

餘款併着該部議覆欽此欽遵抄出到部送司案  
呈到部該臣等看得

國家當東西交訌之時司計者必急催科之令閭  
閻值膏髓盡竭之候憫時者恒懷撫字之仁邇  
者虜騎生郊征調業遍宇內浩費無經轉運徑  
如流水誠岌岌乎不可支矣蒙

聖明睠念匱詘特遣京卿立限分催原非得已但恐  
有司不能善體

皇上之心或至追比太過民不堪命則所憂更大此  
科臣表君賜之所以鯁鯁厚慮而以不病民不  
悞

國之法請也其一謂新舊之宜酌限期之宜定查  
得用一緩二自古記之惟是軍興孔棘率土同  
讐不得已而新徵舊欠並責於一時者勢也然  
酌量於緩急之間權衡於新舊之數安得無法  
而處此查宇內郡縣其沃土膏壤多爲有力者  
所據而笑笑小民不過分其澆瘠者耳每遇開  
徵豪宦強宗恃勢而敢於抗違積書奸胥相倚

而巧爲欺隱惟將此無可告語之小民千敲萬  
朴完今年又完明年而此輩之積欠莫可誰何  
甚至司道之那借州縣之侵漁竟至如河南南  
陽不可問而槩曰欠在民也果真欠在民乎我  
皇上洞見萬里曰有司催科有方民自樂輸在外有  
司而果能不侮鰥寡不畏強禦真得催科之方  
矣况

欽使四出催解萬不容緩務在多方鼓舞地方完納  
先循役而次紳紳照數先完卽行起解如敢有  
抗違隱匿者立破情面嚴加追比以足舊欠新  
徵之數至欠在小民者按其地方收穫之蚤晚  
蚤者限至麥後遲者限至秋初以便續解倘有  
逋欠卽加以夏楚彼又何詞一轉移間而

公家之急可需小民之苦可救矣一追比無假於  
佐貳硃票無輕授之於衙役查得佐貳前途有限  
惟利是嗜一經追比反開納賄之門無益貢賦  
之實至於衙役下鄉勢如狼虎鷄犬爲之不寧  
賣兒貼婦之錢盡供衙蠹之腹又奚暇以供正

賦哉合如科臣議一切錢糧責令正官依限親  
比嚴令致期毋假手於佐貳毋縱毒於爪牙則  
民不擾而賦自完矣一

欽錠之音宜申耗搭之弊宜革查得耗搭之弊起於  
各州縣起解司府銀兩大錠不足五十兩因有  
添搭而習俗相沿不變有不足而添搭者亦有  
足而尚有添搭者至解京日司府將正銀并餘  
銀再與解官秤兌准足多有以原封原銀盡付  
解官者而無如不肖者之別有肺腸何也解官

在途延推不前或改領錠以盜銀水而添搭盡  
入囊中其進戶者僅此大錠已耳勢必短少反  
藉口於內外法局之不一臣部前年較定兩庫  
法局從領式各省如河南山東等處已皆領去  
俾內外較然盡一復立兌支之法令下役不得  
高下其手正慮銀錠或有參差不齊故設法爲  
清楚計耳科臣客歲具疏銀錠務准足五十兩  
上造

聖旨字樣不許添搭碎銀臣部具覆業經申飭矣而

在外者竟裹如充耳也其到庫者仍多輕重不  
等臣部復令該庫積令解官與各鎮委官交兌  
類相持不相下合無再將前法申飭一番務要  
秤兌勒字以防解官在途作奸入庫銀錠如無  
聖旨字樣并短少者管庫司官先行呈堂查其短少  
分兩叅處治罪如銀錠不差而管庫司官有過  
求者除究需索之人仍將司官定擬劣考一以  
蘇小民之困苦一以充

公家之正領實清而葛藤斷是永利之道也以

上三款皆催科之善術而有裨於民隱所當申  
飭舉行者也至於漕務一節查得漕糧每石正  
米之外有一六二六三六之加載在議單其來  
已久非自今始增也邇來州縣有司恣意延緩  
有船已到而米未上倉者有完正米而未有餘  
米者運弁水次坐候聽其延捱甚至無米折銀  
入囊無怪乎漕運愆期而掛欠之多竟不可究  
詰也去年爲漕事大壞該巡倉御史宋師襄欲  
復監兌之舊奉有

明旨諭令臣部差委司官臣部深慮當事體久廢之  
後司官人微權輕不能返極重之勢司官亦多  
却步但無可奈何耳夫司官能治運弁而不能  
束百姓責成糧儲道臣軍民兼管似可永久無  
弊且當日設立司官之意不過欲以地方米數  
之完欠起運日期之遲速時時申報臣部得以  
與聞耳前科臣鮮學龍論漕運疏中各省糧儲  
道押運至津門方許回省其起運日期數目亦  
嘗以部則監兌司官可以不設但今正當交兌  
之時不便卽撤姑俟今歲差滿更代之時然後  
續議裁否可耳至於光祿米支放自有定額寺  
臣銳意剔釐欲存加耗以脩積儲痛革私賚之  
陋規可免漏卮之夙弊或存新而散舊或新舊  
之兼支科臣所議誠爲不刊之典是在光祿諸  
臣設誠而致行之無容臣再贅一辭矣旣經具  
題前來相應覆

請恭候

命下臣部移文各該衙門遵奉施行



崇禎三年三月十二日具

題十六日奉

聖旨軍興煩費這禁革三款有禪催徵着申飭行司  
官監兌方在責成何得議裁光祿浮米耗酌支  
該寺酌議具奏欽此

覆陝西總督緩徵三府新餉疏

題爲遵

旨回鎮再陳三邊危苦之情仰祈

聖鑒事專理新餉山東清吏司案呈崇禎三年三月  
初五日奉本部送戶科抄出陝西總督楊鶴題  
前事等因本年三月初三日奉

聖旨該省民窮督臣請命朕豈不念但欠餉豈盡在  
民差催何礙撫字這所奏着該部酌議行欽此欽  
遵抄出到部送司案呈到部爲照秦中天府素

稱沃饒矧民俗淳龐勇於鬪戰茲值虜警告急  
大司馬徵甲殺函而入援健兒計一萬五千有  
餘所需安家行糧督臣楊鶴同藩臣王順行苦  
心搜括勉強那移稱苦稱厄千真萬真則秦中  
近來之光景已入

聖明朝鑒中矣獨念臣部以池泉不繼之帑藏補苴  
汪洋無底之江河督臣所云內莫難于戶部外  
莫難于藩司同心之語其誰知之但延慶平三  
府素稱疲瘠數年來疊罹兵荒原與西安等府

肥瘠有間三府所徵崇禎三年遼餉銀共六萬  
七千餘兩原係額派經制之數茲當奴氛未靖  
需餉倍煩正苦措處無從三府民隱雖當軫念  
然業蒙賑濟之典似難又邀蠲免之仁合無姑  
議緩徵少寬時日俟秋成之後陸續解完可耳  
至于差官督催無返駕之理或將原定限期少  
寬二月地方便於措辦其餘各府仍先行起解  
三分以濟急需則撫字與催科並得而

國計其民生均賴矣既經具題前來相應覆

請恭候

命下臣部移文各該衙門遵奉施行

崇禎三年三月十三日具

題本月十六日奉

聖旨延慶平三府額餉姑着緩徵寬限餘府務要遵  
旨完解不得稽遲該衙門知道欽此

覆呂僕少奏報山東初解錢糧疏

題爲依期督餉謹據冊彙報起解銀數以完

欽限以濟

國急事專理新舊兩餉司案呈崇禎三年三月初

二日奉本部送戶科抄出該太僕寺添註少卿

呂維寧題前事等因崇禎三年二月三十日奉

聖旨呂維寧奏報山東起解錢糧着各該部查收這

已解的是否果係呂維寧經催新數一併查奏不

得混美據稱東江餉銀發過二十四萬有餘係何

月日如何該鎮尚勤呼請着再行確核以後催餉各官奏報到日該部科卽將各省直起解存留開銷款項分數細加磨勘以杜影借該部知道欽此  
欽遵抄出到部又奉本部送據司務廳呈准戶科手本同前事內稱照得守催山東錢糧少卿呂維寧疏開起解各項錢糧是否本官經催東江餉銀是何月日題發相應行查等因各送司案呈到部除馬價聽兵部料價聽工部查覆外該臣等查得山東省崇禎元二年之應徵以暨崇禎三年之預徵五分通計新舊餉共銀一百三十三萬二千三百二十七兩零此間卿呂維寧承催之數也今據該省藩司冊報解部銀九十六萬九千九百四十七兩八錢此藩司冊報而間卿據以入

告之數也臣部細加查覈如舊餉之壓徵災疫減等黃蠟折價與新餉之坐買米銀支放登餉俱當聽其扣除內惟東江留餉二十四萬五千二百兩則不能無說而處此者臣查崇禎三年正月

內據東江理餉郎中朱獻呈請月餉臣念島軍  
枵腹照會藩司將本年額餉酌發三分之一隨  
後復准兵部來咨內開島兵奉

旨調撥行令藩司發銀五萬兩令東江餉司會同登  
萊道赴島給散嗣後並未有文發餉豈得盡云  
解發此不過留此全解之數以作解部之開除  
耳

明旨着臣部再行確覈真明見萬里矣夫島兵不  
旨調撥則前銀不必扣留臣部已經行文藩司  
銀五萬外再留五萬兩其餘盡行解部總計藩  
司應解臣部者共計一百一十一萬五千一百  
餘兩矣先解三分共該解銀三十三萬四千餘  
兩今已起解三十萬三千三百九十八兩五錢  
零又買遼豆用過銀三萬七千八百二十七兩  
八錢零共完過三十四萬一千二百二十六兩  
零可謂克副先解三分之

旨矣其發過援兵安家銀一萬七千五百九十二兩  
一錢零舊例應動兵部銀兩臣部不便徑准開

銷難作完數至查起解批文雖有出於殘冬春  
正之際當其卒聞虜警有回轅而收貯于庫者  
亦有起批而未解者臣部俱作欠數盡載罔卿  
催劄之內維時罔卿呂維寧身承

簡命未出都門之時卽移文該省撫按飛檄一至藩  
司催督起行而錢糧之接踵至部者不可謂非  
罔卿催督之力也且解到之銀俱係經催之內  
則罔卿不得不作已完之數矣其未完錢糧目  
今罔卿一面行催一面督解東省藩司素屬急

公勢必源源而至而軍餉之匱乏似亦可接濟  
於萬一也旣經該司查核明白案呈前來相應  
覆

請恭候

命下臣部行文山東巡撫及催餉差官并咨都察院  
轉行山東巡按御史及照會布政司遵奉施行  
崇禎三年三月十五日具

題本月十八日奉

聖旨呂維寧催到銀數旣經查明准完前限餘仍依

限督催欽此

覆崔餉部薦舉關鮮二運官員疏

題為二年關運事竣謹遵例

奏報并叙在事効勞官員以彰激勸事專理新餉

山東清吏司案呈崇禎三年二月二十四日奉

本部送戶科抄出天津督餉部院崔爾進題前

事等因本年二月二十一日奉

聖旨戶部知道欽此同日又該津部崔爾進題為崇

禎二年鮮運事竣謹遵例

奏報并叙在事効勞官員以彰激勸事奉

聖旨戶部知道欽此又該督餉御史沈猶龍題爲二年關運事竣等事奉

聖旨戶部知道欽此又該督餉御史沈猶龍題爲崇禎二年鮮運事竣等事奉

聖旨戶部知道欽此欽遵通抄到部通送到司案呈到部該臣等看得關鮮之兵馬全憑津運以資飽騰而所藉以儻催輪輓者又惟理餉司道諸臣及督運武職各官之協力急公是賴每年運事告竣例有題叙之典此督餉部院會同督餉

御史疏報運事而叙及在事効勞各官所自來也今查崇禎二年關寧糧料除折色豆一十五萬八千三百一十四石五斗折銀六萬六千四百九十二兩九分徑給關外餉司支給外實該本色米八十萬九千三百二十石豆五十一萬二千五百石五斗共該米豆一百三十二萬一千八百二十石五斗今疏報見運并預運共米豆一百一十六萬二千九百四十六石九斗四升內已獲實收者一百八萬八千二百六十五



石九斗六升七合守凍未獲實收者一萬八千  
八百四十二石二斗掛欠者七千三百五十二  
石三斗三合失風者二萬九千四百二石七斗  
撈救者三百八石五斗失盜者一千九百三十  
石又附關召買米三萬石豆八萬三千一百石  
永平鎮召買陸運豆四萬石薊鎮召買陸運豆  
二萬石又元年預運米豆一萬六千八百四十  
五石二斗七升以上連前折色共運米豆一百  
四十九萬四千三百六十一石四斗四升除額

數外多運米豆一萬四千二百二十六石四斗  
四升而催運過元年守凍掛欠等項米豆不與  
焉查二年鮮運額該糧米八萬石據報俱照數  
運發已獲實收者七萬二千八百一十六石外  
失風米六千七百九十八石掛欠米三百八十  
六石而隨船帶運之布疋蓆彈不與焉夫茲海  
運一役也從波濤險阨之中爲飛輓接濟之策  
亦綦難矣而鮮運猶甚今以關運言之雖實到  
者不免歉於額內而運發者已是逾於額外矣

以鮮運言之先該督餉部臣會同總督經畧餉院諸臣題

准鮮運十抵七八便以首功論今已實到九分已上矣倘非督餉部院握筭持籌調度得法及各司道廳之竭蹶僨催各將領運官之協力急公曷克臻此及查今歲鮮運強半派於登萊津門船戶皆以照舊絲登轉運爲便則河東餉司似應如津部之議駐劄登州以便就近督催者也其開運之多運米豆一萬四千二百餘石內應除

抵本年掛欠七千三百五十餘石止餘六千八百七十四石一斗三升七合應作預運三年之數也至於未獲實收之應催漂風盜失板片水脚之應追損壞船隻之應修悉聽督餉部院照例議行外所有在事各官文職如專理新餉山東清吏司郎中薛邦瑞原任新餉司郎中今陞河北道范鑛天津餉司主事樊維城通州原管西倉郎中楊應震通州坐糧廳郎中丁流芳關外餉司今陞關內道王楫關內原管餉司郎中

閔頌行關內餉司才化神德州原管倉主事徐  
天鳳德州管倉主事焦觀祖臨清管倉主事鄭  
廷楫河東餉司郎中宋獻以上本部司屬諸臣  
濟世慈航匡時大器平出入而錙銖不爽籌轉  
輸而飽騰攸賴洵勞績獨高而聲實並懋者也  
督餉道僉事張志芳天津道右叅政石聲諧漕  
儲道右叅政周鼎關外道右叅議孫元化以上  
兵道各道諸臣望隆鑰鑰功懋金湯瞬息而備  
百萬之料糧咄嗟而俾三軍之舍鼓斯鼓所稱

社稷之勞臣也天津兵糧同知王秉衡河間府同知  
白麟督催漕船淮安府同知劉志斌天津管糧  
通判今陞任蘇鳴瑜前屯管糧通判馮泰運寧  
遠管糧通判李茂根錦右管糧通判朱正源管  
糧署通判事劉應鶴以上管糧府佐諸臣潔守  
通才條分縷析任事則夙夜不辭勞瘁績運則  
舳艫立見飛馳亦庶幾實心任事者矣以上司  
道府佐各官皆有功於運務均宜移咨吏部紀  
錄優叙而津門餉司樊維城餉道張志芳職專

海運尤勞苦而功高似當亟為優擢以酬勞勤者也武職如天津副總兵劉國柱標下中軍遊擊張其功海防營叅將張夢鯉標下叅將顧景元原任正兵營叅將宗餘廕標下旗鼓都司今宜加銜韓嗣增標下都司朱良將總理海運遊擊張允昌標下旗鼓守備只啓濬內丁營守備張令標下加銜守備今應實授楊才餉司中軍守備只啓第督餉道中軍加銜守備今應實授高一凱天津道中軍加銜守備今應實授賀盛

明洪字前號運官加銜都司今應實授高登備  
 玄字前號運官陳大統黃字後號運官許私相  
 宙字前號運官金萬鎰洪字後號運官婁志達  
 柔字號運官李文盛順字號運官查志洽熙字  
 號運官陳宗錦利字號運官王廷傑承字號運  
 官邸進忠平字號運官黃孟璞總理鮮運叅將  
 王學易河東皮島左協營副將陳繼盛標下叅  
 將高翺標下遊擊平登雲王字號運官遊擊胡  
 遠大沽總催都司于從朴寧字號運官都司羅

元霖標下候缺旗鼓守備吳友仕恢字號運官  
守備劉尚仁標下守備胡我定喇字號運官守  
備俞鼎守字號運官守備漆爾誠餉司巡捕守  
備張子壽天津道旗鼓守備今應實授局天令  
餉道巡捕守備董士元標下千總趙弘祖以上  
武職各官報

國心丹急公志銳擊楫而風雲變色轉輸則瘼瘵  
無呼等級雖殊勞苦則一均應移咨兵部分別  
紀錄優叙以示激勸者也既經督餉部臣等臣

會題前來相應覆

請恭候

命下臣部移文吏兵二部并各該衙門遵奉施行

崇禎三年三月十七日具

題本月二十七日奉

聖旨這津運文武各官着與分別叙錄該部知道欽  
此

覆科臣王猷卹畿民優將士疏

題爲體臣工惠畿民以布

聖德以昭神武事專理新餉山東清吏司案呈崇禎  
三年三月初七日奉本部送戶科抄出兵科給  
事中王猷題前事等因本年三月初五日奉

聖旨奏內畿民當恤將士當優說得是郊外兵何故  
不得一飽并驛站召買等事着該部查議具奏諸  
臣各營職業自無他過有何凶懼該部知道欽此  
欽遵抄出到部送司除事隸吏兵二部者合聽

該部議覆外所有畿民當恤等項相應摘覆案呈到部該臣等看得奴孽披猖蹂躪內地舉二百年愛養之赤子殺掠幾盡死亡傷心流離滿目此鄭俠之圖所不能寫而賈生之哭所不能悉者也我

皇上於災殘地方議蠲議賑不啻已溺已饑之

鴻仁矣但風鶴驚魂之後化儻者無室家之歡擄掠者有墳墓之悲是在州縣有司省徵歛寬文法於撫安之中寓招徠之意則收拾人心之大機

括也至各省直徵甲應募果皆飲血之壯士乎當其驅車不過厚與糧餉以示鼓舞入衛以來聽胡笳而心悸望羶風而氣短乃有羨故里之安逸嘆一飽之無時者此其間蓋有說焉各省援兵途次行月兼支是以每日有給五六分者此至

都門舊例行糧鹽菜不過三分食米一升五合已耳夫各兵而果甘心食淡也所得銀米亦足供一日之用倘縱口腹之慾饜飫酒肉餅餌等項

舉箸幾何卽罄杖頭錢又烏能恣其貪饕而望其果腹乎在軍士多一分卽壯一分之勇氣糧餉正不厭奢在臣部發一分卽減一分之正額供億定須有制若各將士果如科臣所言靡敢定居一月三捷無遺清人河上之譏卽傾太倉而資飽騰臣部亦所不惜也其如結局之無日餽餉之殷煩何哉乃若召買一事亦有須商議者詩曰惠此京師以恤四國則畿南之民臣部豈容膜外置之但聞寧薊鎮俱恃召買以爲續命之膏撻伐方張緩之須臾而不可得先是臣部憫念畿民窮苦查照往年預計之數豆米每石已加一錢如良鄉固安等處被虜殘破已經免派其餘地方此後或酌量緩急裒益多寡又或市價果騰相機量增是在津部與督撫道臣隨時隨地自有權宜妙用必不致膠柱而鼓瑟者也否則蘇民困以重根本臣部當同科臣爲民請命而尚敢爲無執之徵以困此凋瘵之衆哉旣經具題前來相應覆



度支奏議  
請恭候

命下臣部移文各該衙門遵奉施行

崇禎三年三月十八日具

題本月二十一日奉

聖旨這覆奏安民恤軍等事知道了兵士行糧須關  
支有法方需實惠召買米豆申飭有司務實價及  
民還着該部科一弁用心稽核無徒以例發了事

覆議典舖輸助軍屯加派疏

題爲回

奏錢糧款目事專理新餉山東清吏司案呈崇禎  
二年九月初六日奉本部送戶科抄出順天府  
署府事府丞魏光緒奏前事等因本年九月初  
二三日奉

聖旨這回奏錢糧抵兌通融等項該部便行覆覈具  
奏欽此欽遵又先該

中都留守司署正留守朱之屏奏爲遵

旨回奏并述官軍可憫之情根本當虞之狀以祈  
聖鑒以固重地事等因八月初九日奉

聖旨該部知道欽此欽遵抄出到部送司除議抵兌  
籽粒銀六千九百餘兩東廠地畝銀一千兩隨  
經呈堂批送福建司行文該府及屯田御史查  
議又

大工加派等項之應蠲免力止者事屬工部聽該部  
議覆外所有典舖軍屯等項相應并覆案呈到  
部該臣等看得典舖輸助及加派軍屯係雜項

新餉之兩項也案查典舖一欵先該臣部題

准會議條例省直典舖酌分五等計資本萬金以上  
者爲一等歲輸銀五十兩七八千金者爲二等  
歲輸銀四十兩五六千金者爲三等歲輸銀三  
十兩三四千金者爲四等歲輸銀二十兩一二  
千金者爲五等歲輸銀十兩全收完解充餉等  
因通行已久近據南北省直及近

畿輔外州邑靡不遵依額派各有輸助解部充餉

獨

京城內外質典之舖不啻千家而擁資極饒獲利  
極厚反無派納匪特賦稅不均而於餉實有遺  
助也府臣魏光緒議令一例均派又慮豪右阻  
撓議委風力科道按冊坐派有強梁者題叅治  
罪是導近商以必赴之的而示遠商以惟均之  
政也相應舉行正在議覆間突逆虜入犯內外  
震驚各典舖面雖設常關方欲曉諭其開而不  
得奚可倡派納以閉小民質貸之門乎相時揆  
勢合俟事平之日同流寓一款另行題

請舉行者也又查軍屯一項先該臣部題

准會議條例衛所屯田原與民田一體除山陝極邊  
免議外題照征播例每糧一石加銀八分其兩  
京衛所屯地本部咨行都察院轉行屯田御史  
各照派徵解部等因通行在案若鳳陽爲  
太祖高皇帝龍興豐鎬故於

皇陵一衛每石止加派四分示殊恩也若鳳陽中等  
八衛一所均照八分之派昭畫一也今守弁朱  
之屏以

皇陵一衛軍屯獨得減派欲援此以例其餘且念洪塘一所丁絕田蕪而代爲請

命在該弁或目擊疲衛之顛連賦稅之無出不得不據實以

告第目今虜踞內地地方苦額餉之不敷奚可開蠲免之端以啓各屯觀望則寬恤之政似應徐議可也旣各具奏前來相應覆

請恭候

命下臣部移文各該衙門遵奉施行

崇禎三年三月十九日具

題本月二十三日奉

聖旨依議行欽此

覆津部南直兩年召買舉劾疏

題爲南直兩年召買事竣謹遵例

奏繳并分別舉劾在事官員以昭激勸事專理新  
餉山東清吏司案呈崇禎三年二月二十一日  
奉本部送戶科抄出天津督餉部院崔爾進題  
前事等因又該督餉御史沈猶龍題同前事本  
年二月十九日俱奉

聖旨戶部知道欽此欽遵又該天津督餉部院崔爾  
進題爲崇禎二年津門召買事竣謹遵例

奏繳并叙在事効勞官員以昭激勸事等因又該督餉御史沈猶龍題同前事俱奉

聖旨該部知道欽此欽遵通抄到部通送到司案呈到部該臣等看得三韓之士卒全賴本色以資飽騰而本色又必借召買以供接濟則召買一事所關甚重矣是以年前則預計事竣則考成急公者勸怠玩者懲皆所以申明

功令而激勵將來者也今據督餉部院崔爾進會同督餉御史沈猶龍將南直兩年之召買津門

二年之召買事竣具疏銷筭條分縷晰款項昭然臣謹通查原疏而覆覈之查天啓七年原派淮安府買米一萬石該府呈詳撫院批允連水脚等費動支過新餉銀一萬一千五百七十八兩九錢五分零已完解津米九千三百一十四石未完米六百八十六石該銀七百八十七兩三錢六分零應俟追完方准開銷揚州府派買米一萬石共動過新餉等銀一萬四百八十兩七錢七分零照數買完解津發運訖前銀應准

開銷徐州派買豆三萬石每石定價五錢五分  
止該動支新餉銀一萬六千五百兩淮與開銷  
其多支過銀一千五百二十一兩應搜括別項  
抵補不宜在新餉內銷筭者也此七年分召買  
米豆完欠之數也查崇禎元年原派廬州府買  
米二萬石動支過新餉銀一萬九千七百五十  
八兩二錢五分五釐照數買完解津發運訖前  
銀應准開銷鳳陽府買米二萬石動支過新餉  
銀二萬四百八十四兩二錢七分八釐零照數

買完尚多米二斗五升俱解津發運訖前銀應  
准開銷淮安府買米三萬石動支過新餉銀三  
萬五千五百七兩八錢三分零照數買完解津  
發運訖前銀應准開銷揚州府買米二萬石動  
支高郵等州縣解到本年新餉銀二萬二千九  
百九十二兩一錢七分零照數買完解津發運  
訖前銀應准開銷徐州買豆二萬石原定價銀  
一萬一千兩照數買完解津發運訖前銀應准  
開銷此元年召買米豆全完之數也夫南直距

度支奏請  
津數千里則難不在召買而在輓運今廬鳳淮  
揚徐四府一州兩年召買米豆共以十六萬計  
爲數頗多而未完者止淮安府解官把總黃正  
色侵欠七年分米六百八十六石餘皆如數解  
發則南直撫臣與天津部院籌邊爲

國之深心可謂竭盡無餘而各該道府州縣之協  
力急公勞績亦有不吝氓者如淮海兵備道布  
政使胡爾慥淮徐兵備道右叅政楊廷槐揚州  
兵鹽道副使王象晉潁州兵備道右叅議胡沾  
恩以上司道官四員肅憲貞度弊絕風清軍儲  
絡繹於江海之間勞績大禪於軍

國之重所當紀錄優叙以備大用者也淮安府知  
府董允升揚州府知府徐伯徵原署高郵州揚  
州府通判王經世原署桃源縣淮安府通判陶  
安齡廬州府署印推官簡文瑞泰州知州李自  
滋壽州知州郭宗振六安州知州熊之彥通州  
知州董發惟徐州知州韓雲高郵州知州盧燦  
無爲州知州李春華亳州知州趙應坦江都縣



知縣遲大成山陽縣知縣朱國棟興化縣知縣  
王績燦舒城縣知縣王觀光泰興縣知縣孟名  
世蒙城縣知縣王正志如臯縣知縣吳弘功合  
肥縣知縣柯彥臨淮縣知縣魏國柱宿遷縣知  
縣楊獻吉天長縣知縣臧太初沐陽縣知縣程  
接孟碭山縣知縣李春鯨霍丘縣知縣阮維岳  
盱眙縣知縣孫徵奎廬江縣知縣楊埭清河縣  
知縣魏知微虹縣知縣曹繼芳以上府州縣正  
佐官三十一員撫字殷勤催科勞瘁咄嗟而完

十六萬之儲糶拮据以資億萬衆之飽騰所當  
一體薦揚以倍擢用行取者也其淮安府元年  
分委官守備朱良臣調停有法頌聲蔚起相應  
紀錄示勸七年分委官把總黃正色掛欠既多  
侵漁不少相應監追究罪完日發落者也查崇  
禎二年原派天津召買豆九萬九千四百石五  
斗每石定價五錢五分共給銀五萬四千六百  
七十兩零據疏共買過八萬七千六百五十二  
石內未完豆五百三十五石見行兩廳追補外

尚該額豆一萬一千七百四十八石五斗出存  
倉之陳因以濟急隨即發價買新以補之督臣  
之權宜應變可謂愈出愈周且於原給額價之  
內共節省銀六千四百兩有奇以抵上年漕糧  
掛欠之數雖云臣部給價預期故得及時賤買  
然非督臣綜覈詳明剔釐耗蠹及多方之勸勉  
則茲六千餘金安能保其不歸委官之私囊乎  
其効勞各官除關鮮二運疏內薦舉者不開外  
如津部標下都司鄭憲武督餉道守備張國英  
督餉道淮津中軍守備李維城標下巡捕指揮  
杜顯卿天津右衛指揮李効忠標下委官天津  
衛右所千戶李景忠天津右衛千戶張雲龍天  
津衛中所百戶梁廷棟海防營千總賈鴻家標  
下旗牌官百戶應襲張凌雲督餉道加銜守備  
崔君惠張光啓天津衛經歷黃道中天津右衛  
經歷呂承祥以上文武等官十五員不辭胼手  
厝足之勞共効水輓陸輸之役鎔銖無異關鮮  
攸資所當紀錄優叙以示激勸者也既經督餉

部臣臺臣會題前來相應覆

請恭候

命下臣部移文各該衙門遵奉施行

崇禎三年三月二十二日具

題本月二十五日奉

聖旨是欽此

覆兵部議募練土著疏

題爲援兵難聚難分募練宜近宜早謹陳增新之法以遏換班之虜事專理新餉山東清吏司案呈本年三月十七日奉本部送准兵部咨該兵部題前事等因本月十六日奉

聖旨勸兵募練土著屢見條陳這疏規畫更悉卽着飭行所需銀兩移會戶部如議分發刻期覆奏欽此欽遵咨會到部送司案呈到部該臣等看得狡奴更番反客爲主強弱之勢旣有所不敵分

合之機又有所不侔不爲徒薪之計難免厝火之憂增兵大創未有急於此時者也善哉樞臣之言曰調兵不如募兵遠募不如近募急選精銳三萬以掃胡塵真滅虜第一方畧至安家一項欲分臣部加派之三十萬以與之臣部雖誼切相成而力實有不能給者謹以加額之繇與虧額之故爲我

皇上陳之查自有遼難以來宇內地畝加派二次每畝共加七厘共計銀四百萬六十餘兩後因調

募紛紛安家器械無措兵工戶三部會議又加

一二厘共計一百二十萬兩維時原議待事平日

仍歸戶部此當日加派五百二十萬有奇之額

也繼而北直八府之四十六萬以首善蠲免矣

潞庄長沙九萬蠲免矣至蜀餉之十二萬滇餉

之一萬六千楚餉之六十五萬粵西之二萬盡

割以餉黔并工部分餉等項較之原額已去一

百六十六萬而正額日虧矣况拖欠者尚多也

先是天啟二年該前任尚書汪應蛟題將分餉

歸併臣部屢奉

欽依在樞部亦知臣部之乏未有異詞此加額分合之始末也今乃摠成案而索帳於臣部豈知割而爲餉與奉

旨蠲免者均在此數之內乎臣前於會議疏中知安家衣裳亦樞部所急需酌議裁節驛遞存剩銀兩可以抵充此項亦未嘗不曲爲設處矣及查入援城守各兵塩菜行糧事出創起未有額設而動支正項者已近七八十萬方慮向後無處

抵補省直各處援兵其用過安家衣裳器械多於新舊二餉取足尚未盡行開銷樞部特未之知耳目今議募三萬按口授食歲得餉五十萬而本色料草不與焉今蠲免者不復派楚餉止割其半尚聽督撫酌議而未有的據矣卽措正額之餉方懼無米難炊若欲再分正額以作衣裳馬匹之用臣部卽粉骨碎身其何能辦此也惟是事關封疆何敢強分畛域昨准兵部咨文移會臣部卽發銀三萬兩聽充薊遼總督募兵

之用至如驛遞減省此在樞部自爲督催自可  
供億其有不足亦俟臣部外解充裕再行量爲  
湊解必不肯以膜外視之若欲取盈於三十萬  
之數不但臣部舍已耘人力不從心抑且顧此  
失彼大誤

國計樞臣同病相憐臣誠不能無厚望也旣經咨  
會前來相應覆

請恭候

命下臣部移文兵部知會施行

崇禎二年三月二十二日具

題本月二十四日奉

聖旨遵屯原有額兵額餉募補只須衣裝這發去銀  
三萬兩着先行招選土著支用不敷續與措給驛  
遞節省的兵部催解事關封疆中外各宜協心刻  
期幹辦勿致延緩該衙門知道欽此

覆南戶部題旗助餉諸臣疏

題爲虜警異常軍需最亟謹將助餉諸臣列名具奏以見尋仇敵愾之義并

請優叙捐貲義生以勸將來事專理新餉山東清吏司案呈崇禎三年三月初九日奉本部送戶科抄出南京戶部尚書鄭三俊奏前事等因本月初七日奉

聖旨這南都諸臣捐貲助餉具見急公銀俱着照數解進以資軍賞監生汪機好義樂輸着查例優叙

該部知道欽此欽遵抄出到部送司遵行間准禮部儀制清吏司手本爲

聖化無遠不被義民有忠樂輸謹據實

上聞仰祈

聖鑒事內稱奉本部送禮科抄出巡按江西監察御史范復粹題前事等因奉

聖旨日據奏劉良賓捐貲輸入尚義可嘉着查例從優褒勸該部知道欽此欽遵查往例捐助餉銀等項俱係貴部題覆今劉良賓科抄已到本司日久

註銷甚爲不便相應移會前去戶部新餉司煩將劉良賓查例題叙等因到司相應一併具覆案呈到部該臣等看得虜騎披猖王師捷伐止戈無日措餉彌艱所賴遐邇之輸將少佐軍興於萬一顧身列

朝班厠名仕籍者原有臣子之誼應効纓冠之救彼草莽之士市井之夫名未掛於冠紳事不關於勸募慨然輸助多金以爲天下倡此其懷忠抱義爲何如者屢奉



皇言一則曰查例優叙一則曰查例從優褒勸

明綸一布將使四海之內率土之賓靡不響應景從  
所謂上好仁而下未有不好義者也案查萬曆  
四十七年十月內臣部題

准凡義民輸貲五十兩以上者官爲劄給冠帶給匾  
一百兩以上者題給冠帶給匾二百兩以上者  
題給冠帶匾外許自監坊以上各免本身襍差  
有司以禮相待四百兩以上者題給八品散官  
名色給匾禮待許自監坊量免一丁八百兩以

上者題給六品散官名色給匾禮待外官爲監  
坊量免二丁刊書頒布中外通行在案天啓元  
年九月又題定捐助規格京外文武官紳舉貢  
人等助餉四百兩以上粟米八百石以上者士  
民五百兩以上者各題建坊請

勅騰黃頒給其銀不及例者行撫按分別官民各以  
其類建坊給匾又查天啓三年該四川巡撫朱  
爨元題爲監儒仗義助餉援例乞授職銜以彰  
勸典事內稱監生李鰲捐助二千五百兩比照

援遼事例請題中書職銜等因奉

熹宗皇帝聖旨該部知道欽此欽遵覆奉

欽依在案前後事例雖殊無非鼓舞急公之典也今  
徽州監生汪機輸助三千兩在本生未必有沽  
名千譽之思然其捐貲慕義之念誠有可風此  
南部臣所以有題授應得職銜之請也合照監  
生李鰲例擬以中書職銜義民劉良賓輸助一  
千兩合照義民輸納八百兩以上例給以六品  
散官名色給匾禮待外但財用方匱仍以目爲  
鑒坊如是則優叙與褒勸並溥而慷慨仗義之  
倫輸將恐後在

朝廷施不費之恩在軍餉被無疆之利矣旣經具題  
并移會前來相應覆

請恭候

命下臣部移文吏部將監生汪機照例授職肄業義  
民劉良賓照例查給六品散官劄付并咨南戶  
部及通行各省直申傍遵奉施行

崇禎三年三月二十九日具

題四月初三日奉

聖旨是欽此

覆總理馬世龍月餉未給疏

題爲仰承

天語瀝血再陳懇辭重銜以安愚分建微勞以酬

聖恩事專理新餉山東清吏司案呈崇禎三年三月  
二十二日奉本部送准兵部咨據總理總兵官  
馬世龍題前事等因本月二十日奉

聖旨馬世龍受任已久便當實心圖功何乃臨敵辭  
銜還着鼓勵自効不准辭奏內進取有緒紛更無  
實是何所指卽明白說來月餉何故數月未給着

戶部速查具奏欽此欽遵移咨到部送司案呈到部該臣等看得奴患方張捷使伊始同仇之旅雲集東向於是殫外解物力竭海內精神日夜供億薊門而惟恐或後方竊謂饋餉庶幾無缺飽騰從此有資而不料總理馬世龍以數月無餉入

告也恭奉

明旨令臣部查明具奏因從頭打筭按數稽查則所謂月餉不敷者果指目前之缺乏乎抑指從前

之缺乏乎夫計口授食因兵數餉臣部之職事也薊門有援兵亦有主客兵各有分屬有應支行糧亦有應支月糧原不容濶據餉司何朝宗報稱駐薊援兵約四萬餘月支鹽菜三萬六千兩零官廩月支三四千兩召買草束并運價每月可得一萬四五千兩又主客兵守禦及在各路者約用新餉一萬兩舊餉年例二萬兩臣部遂以八萬五千爲目前定額矣因查新餉之解薊者如正月分曹愈新鮮一萬兩郝奎光解二

萬兩吳國英解三萬兩黃文秀解三萬兩二月  
分郝奎光解一萬兩王有功解五千兩曹愈新  
等解二萬兩郝奎光解二萬兩曹愈新解二萬  
五千兩三月分郝奎光解二萬兩曹愈新解二  
萬兩是三月間已發過二十一萬矣至如舊餉  
亦在光曹愈新三次共領過春季年例銀五萬  
兩又三月內補過喜峯路去年冬季年例三千  
二百七十餘兩又陸續發過吳自勉尤世祿王  
承恩等處文善抵兌邊鎮月餉銀八千五百

三十兩按之正額所發已無不足矣不特此也  
據監紀丘禾嘉報祖帥合兵開平遂發二萬差  
官曹愈新解至豐潤今監紀現取用一萬仍有  
一萬又王有功二次解銀一萬接濟三屯至如  
總理馬世龍所統關兵行糧之外又支月餉四  
次共支過十萬九千一百七十餘兩且當進關  
入援之日已將十一月十二月餉銀俱經閣部  
借商措給移文在卷通計行月二餉已支至本  
年三月終矣細括兵數原報之外既不能加多

而臣於八萬五千之外又各有給發其它本色  
行糧料草據該餉司亦稱津通水陸轉運及本  
地召買支放不缺臣部自分於薊可謂隨處照  
管備極周詳如是而尚謂不敷臣殊不得其解  
也或者謂二年之餉尚有缺乏乎復查二年舊  
餉原額二十九萬五千五百五十餘兩發過二  
十八萬八千二百七十餘兩而未發者不過七  
千二百七十餘兩耳新餉原額二十九萬六百  
六十餘兩除發過二十五萬六千五百餘兩所  
欠不過三萬四千餘兩耳而二年以前未有欠  
也去冬遵化失陷中協敗衄凡籍於行伍者或  
投逆奴以髡首或爲原野之青燐不知凡幾卽  
現在荷戈食糧之兵或可屈指臣俱嫌於越俎  
而未敢一置問近日督撫募兵已屢贖

宸聽矣如曰土著舊兵從前尚有壓欠是或有之然  
旣見發月餉又盡索從前壓欠無論非臣部力  
量可辦恐亦不便爲各鎮開端者合無將從前  
所欠銀兩查明真正壓欠月分銀數於逐月見

發外每季補給舊欠月餉一月以慰軍士之心  
以鼓敵愾之氣務擇舊在臺路者給發而頂補  
者不得與焉此又臣部曲體軍心而權爲通變  
以應事者之請也既經移會前來相應覆

請恭候

命下臣部移文各該督撫監軍衙門遵奉施行

崇禎三年三月二十九日具

題四月初三日奉

聖旨據奏薊餉解發無欠且虛伍損額俱未停支如

何輒稱餉缺此必經管給放或有他情着何朝宗  
用心清查務使軍沽實糈將無借口仍行督臣實  
開需餉兵數明白奏來以便該部按給餘依議欽  
此

度支奏議

卷八





